



Llywodraeth Cymru
Welsh Government



Carfan Gofal Plant Rhondda Cynon Taf

Grant i Ddarparwyr Gofal
Plant 2020-2021
Canllawiau i ymgeiswyr

1. Diben y Grant

Mae Llywodraeth Cymru wedi sicrhau bod cyllid ar gael i gefnogi'r sector gofal plant yn RhCT wrth iddyn nhw ymdopi â'r heriau sydd wedi dod i law yn sgil pandemig COVID-19. Diben y grant yw:

- Cefnogi lleoliadau sy'n gorfod cau'n llawn neu'n rhannol oherwydd achosion positif o COVID-19 neu oherwydd eu bod wedi derbyn cyfarwyddyd gan lechyd Cyhoeddus Cymru/Profi, Orlhain, Diogelu. Mae modd gwneud ceisiadau am unrhyw gyfnod o gau'n llwyr neu'n rhannol a fu o 14 Medi 2020 ymlaen. Mae modd hawlio'r Grant yma am hyd at 3 chyfnod gwahanol o gau'n llwyr neu'n rhannol.
- Talu costau uwch sy'n gysylltiedig â COVID-19, megis costau gwresogi, glanhau neu wisgoedd newydd neu gostau cysylltiedig ag eiddo oherwydd nad yw lleoliadau'n gallu agor na gweithredu hyd eithaf eu gallu.
- Darparu cefnogaeth ariannol i leoliadau gofal plant sy'n profi caledi ariannol difrifol oherwydd COVID-19 a lle nad oes cyllid cyhoeddus arall ar gael i dalu'r costau hynny.

2. Pwy sy'n gymwys i wneud cais?

- Gwarchodwr Plant
- Meithrinfa - diwrnod llawn
- Gofal y tu allan i'r ysgol (ar ôl yr ysgol/gwyliau)
- Gofal sesiynol (cylch chwarae/cylch meithrin)
- Gofal cofleidiol (ar gyfer plant oed meithrin).

Sylwch - Does dim modd i ni dderbyn ceisiadau grant gan leoliadau gofal plant sy'n cael eu hariannu'n llwyr gan raglen Dechrau'n Deg.

3. Meini prawf

Er mwyn bod yn gymwys i wneud cais, mae rhaid i'r lleoliad gofal plant:

- Bod yn Rhondda Cynon Taf;
- Bydd lleoliadau sydd wedi cofrestru gydag Arolygiaeth Gofal Cymru (AGC) yn cael blaenoriaeth. Efallai y bydd cyllid ar gael ar gyfer lleoliadau heb eu cofrestru ar yr amod eu bod yn dangos ymrwymiad i gofrestru ag Arolygiaeth Gofal Cymru cyn pen 12 mis ar ôl y cais yma.
- Cytuno i gael ei rwymo gan delerau ac amodau'r grant;
- Cytuno i dderbyn e-byst gan Garfan Gofal Plant RhCT fydd yn cynnig cefnogaeth, cyngor, hyfforddiant a'r wybodaeth ddiweddaraf;

- Bod wedi'i gofrestru, neu wedi gwneud cais i gofrestru, gyda'r Gwasanaeth Gwybodaeth i Deuluoedd (GGD) a DEWIS. I gysylltu â'r GGD, defnyddiwch yr wybodaeth gyswllt isod: E-bostiwrch gwasanaethgwybodaethideuluoedd@rctcbc.gov.uk neu ffonio 01443 425006 I gofrestru ar wefan DEWIS, defnyddiwch y ddolen yma i greu cyfrif www.dewis.cymru

Mae meini prawf cymhwysedd pellach sy'n gysylltiedig â phob adran grant wedi'u nodi isod.

4. Beth mae modd ei ariannu?

Mae tair adran grant ar y ffurflen gais. Darllenwch bob adran yn llawn a dewis un grant i wneud cais amdano fesul cais. Os hoffech chi wneud cais am fwy nag un adran (er enghraifft, os oedd rhaid i chi gau'n llawn neu'n rhannol fwy nag unwaith), yna mae rhaid i chi gwblhau ffurflen gais ar wahân ar gyfer pob adran/cyfnod cau. Mae disgrifiad o bob adran isod:

Adran A - Grant hunanynysu (cau'n llawn neu'n rhannol)

Diben y cyllid yma yw rhoi cymorth i leoliadau unigol y bu'n ofynnol iddyn nhw gau'n llawn neu'n rhannol oherwydd COVID-19. Bydd lleoliadau sydd wedi'u cofrestru gydag AGC yn cael blaenoriaeth. Mae'n bosibl y bydd cyllid ar gael ar gyfer lleoliadau sydd heb gofrestru ar yr amod eu bod nhw'n dangos ymrwymiad i gofrestru gydag AGC cyn pen 12 mis ar ôl y cais yma.

Sylwch mai dim ond hyd at 3 gwaith y mae modd i chi wneud cais am y grant yma.

- Mae'r cyllid yn cael ei dalu ar ôl i'r lleoliad ailagor.
- DIM OND ar gyfer lleoliadau sydd wedi'u cau gan Iechyd Cyhoeddus Cymru / Iechyd yr Amgylchedd / y gwasanaeth Profi Orlhain Diogelu.
- Mae modd gwneud ceisiadau ar gyfer cyfnodau o fod wedi cau'n llwyr neu'n rhannol o 14 Medi 2020 ymlaen. Does dim modd i ni gefnogi unrhyw gyfnod o fod ar gau cyn y dyddiad yma.
- Rhaid i leoliadau roi gwybod i AGC/GGD/Carfan Gofal Plant RhCT eu bod am gau drwy gwblhau ffurflen rhoi gwybod am achos positif o COVID-19. Dyma'r ddolen i roi gwybod bod lleoliad yn cau'n llawn neu'n rhannol [Darparwr Gofal Plant sydd ag achos wedi'i gadarnhau o COVID-19](#)
- Rhaid i leoliadau roi gwybod i AGC/GGD/Carfan Gofal Plant RhCT eu bod am ailagor drwy anfon e-bost.
- Bydd cyllid yn cael ei dalu ar y cyfraddau canlynol – £45 ar gyfer pob lle gofal plant llawn amser (10 awr) **nad yw ar gael** oherwydd y gofyniad i hunanynysu.
- £22.50 ar gyfer pob lle hanner diwrnod - hyd at 5 awr y dydd

- £13.50 ar gyfer pob lle gofal sesiynol/cofleidiol/ar ôl ysgol - hyd at 3 awr y dydd
- Bydd y cyllid dim ond ar gael ar gyfer y lleoedd hynny nad ydyn nhw'n cael eu hariannu gan unrhyw gynlluniau eraill nac arian cyhoeddus (Cynnig Gofal Plant, Dechrau'n Deg, cyllid Meithrin Cyfnod Sylfaen heb ei gynnal ac ati). Er enghraifft, os oes rhaid i ystafell gyda 10 o blant sydd i fod yn bresennol hunanynysu, ond mae 3 eisoes wedi'u hariannu gan y Cynnig Gofal Plant, yna bydd y grant yn cynnwys 7 lle.
- Mae'r grant yn gyfraniad i dalu am golli incwm o ffioedd preifat YN UNIG. Does dim modd ei hawlio os ydych chi'n codi tâl ar rieni am y lleoedd hynny.
- Rhaid i chi gyflwyno tystiolaeth o nifer y plant a drefnodd le ar gyfer pob diwrnod o'r cyfnod rydych chi ar gau trwy'r templed lleoedd a ariennir a anfonwyd atoch chi yn yr e-bost gwreiddiol. Bydd angen atodi hwn i'r ffurflen gais ar ffurf dogfen Word. Dilynwch y cyfarwyddiadau ar y ffurflen gais.

Mae modd hawlio'r grant yma am hyd at 3 chyfnod gwahanol o gau'n llawn neu'n rhannol.

Ar y ffurflen gais fe'ch anogir i ateb 'ydw' neu 'nac ydw' os hoffech wneud cais am y grant yma. Os cliciwch chi ar 'ydw', fe'ch cyfarwyddir i gyflwyno ymatebion a thystiolaeth, Os cliciwch chi ar 'nac ydw', byddwch chi'n mynd i'r adran grant nesaf.

Os cliciwch chi ar 'nac ydw/nac oes' i ddweud na fyddwch chi'n darparu tystiolaeth, bydd eich cais yn cael ei wrthod ar unwaith.

Adran B - Costau uwch/costau sy'n gysylltiedig ag eiddo

Mae'r cyllid yma i gefnogi lleoliadau sydd â chostau uwch o ganlyniad uniongyrchol i fesurau diogelwch COVID-19 neu sy'n methu ag agor neu weithredu hyd eithaf eu gallu oherwydd cyfyngiadau ar y defnydd o'r adeiladau maen nhw'n eu rhentu. Bydd lleoliadau sydd wedi'u cofrestru gydag AGC yn cael blaenoriaeth. Efallai bydd cyllid ar gael ar gyfer lleoliadau sydd heb eu cofrestru ar yr amod eu bod nhw'n dangos ymrwymiad i gofrestru gydag AGC cyn pen 12 mis ar ôl y cais yma.

Mae modd i gostau uwch gynnwys:

- Costau gwresogi uwch yn codi o'r angen am awyru
- Gofynion glanhau ychwanegol
- Galw am fwy o wisgoedd ar gyfer staff.
- Fydd yr adran yma ddim yn talu cost eitemau cyfarpar diogelu personol. Mae gan Garfan Gofal Plant RhCT gynllun ar wahân i gefnogi lleoliadau gyda'r gost yma.
- Mae hyn ar gyfer lleoliadau sydd ar agor ac yn dal i weithredu.

Mae cyllid ar gael ar gyfer costau uwch ar ffurf gyfraniad unwaith yn unig tuag at gostau uwch a achosir yn uniongyrchol gan bandemig COVID-19. Dyma'r costau hynny:

- £500 ar gyfer lleoliadau mewn adeiladau annomestig
- £250 ar gyfer lleoliadau mewn adeiladau domestig (gwarchodwyr plant).

Mae modd i gostau sy'n gysylltiedig ag eiddo gynnwys:

- Colli incwm oherwydd bod lleoliadau 'tenant' (ysgol, canolfan gymunedol, neuadd eglwys, cwt Sgowtiaid, ac ati) yn methu â gweithredu neu ddim ond yn gallu gweithredu gwasanaeth llai oherwydd gofynion y 'landlord'/lechyd Cyhoeddus Cymru neu gyngor gan adran lechyd yr Amgylchedd/canllawiau Mesurau Diogelu;
- Costau rhent neu gostau eraill lle nad oes cymorth arall ar gael neu wedi dod i law;
- Costau i staff nad ydyn nhw'n gymwys i gael ffyrlo a/neu unrhyw gymorth ariannol arall er mwyn cadw'r gweithlu. Mae hyn ar gyfer staff gweithredol yn unig, gan gynnwys staff ychwanegol. Dydy hyn ddim ar gael ar gyfer rheolwyr na staff swyddfa gefn;
- Rhaid bod y lleoliad wedi cau'n llawn neu'n rhannol oherwydd cyfyngiadau COVID-19.
- Does dim modd i chi wneud cais am gyllid i dalu costau staffio os yw'r staff yn gymwys i gael ffyrlo trwy'r Cynllun Cadw Swyddi Coronafeirws.

Cyllid cysylltiedig ag eiddo ar gyfer lleoliadau sydd ar gau neu'n rhedeg ar gapasiti llai oherwydd cyfyngiadau cysylltiedig ag adeiladau yw:

Cau'n rhannol

- £1000 ar gyfer lleoliadau gofal diwrnod llawn
- £500 ar gyfer lleoliadau sesiynol/y tu allan i'r ysgol

Cau'n llwyr

- £2000 ar gyfer lleoliadau gofal diwrnod llawn
- £1000 ar gyfer lleoliadau sesiynol/y tu allan i'r ysgol

Staff gweithredol sydd ddim ar ffyrlo:

- £25.00 y dydd ar gyfer lleoliadau gofal diwrnod llawn (£125.00 yr wythnos i bob aelod o staff)
- £12.50 fesul hanner diwrnod ar gyfer lleoliadau sesiynol/y tu allan i'r ysgol (£62.50 yr wythnos i bob aelod o staff).

Os yw eich lleoliad ar agor yn llawn ac yn gweithredu ar gapasiti llawn, fydd eich cais ddim yn gymwys a bydd yn cael ei wrthod.

Ar y ffurflen gais fe'ch anogir i ateb 'ydw' neu 'nac ydw' os hoffech wneud cais am y grant yma. Os cliciwch chi ar 'ydw', fe'ch cyfarwyddir i gyflwyno ymatebion a thystiolaeth, Os cliciwch chi ar 'nac ydw', byddwch chi'n mynd i'r adran grant nesaf.

Os cliciwch chi ar 'nac ydw/nac oes' i ddweud na fyddwch chi'n darparu tystiolaeth, bydd eich cais yn cael ei wrthod ar unwaith.

Adran C - Caledi ariannol difrifol

Mae modd i chi wneud cais trwy'r adran yma os yw'ch lleoliad yn dioddef caledi ariannol difrifol o ganlyniad uniongyrchol i COVID-19 a does dim modd ei ariannu trwy ddulliau eraill, gan gynnwys cefnogaeth bresennol y llywodraeth. Dylech chi ond wneud cais trwy'r adran yma os nad yw'r rheswm dros eich caledi ariannol wedi'i gynnwys mewn unrhyw adran arall a'ch bod mewn perygl o gau yn barhaol. Bydd lleoliadau sydd wedi'u cofrestru gydag AGC yn cael blaenoriaeth. Efallai y bydd cyllid ar gael ar gyfer lleoliadau sydd heb eu cofrestru ar yr amod eu bod nhw'n dangos ymrwymiad i gofrestru gydag AGC cyn pen 12 mis ar ôl y cais yma.

Mae modd i hyn gynnwys:

- Llai o alw am leoedd gofal plant, lle'r farn yw bod hyn yn rhywbeth dros dro ac y mae modd ei briodoli i COVID-19 ac mae'n cael effaith niweidiol sylweddol ar incwm y lleoliad.
- Costau oherwydd cau rhannol / dros dro nad ydyn nhw'n dod o dan Adrannau A neu B.
- Rhaid i chi gyflwyno templed ar gyfer adnoddau/eitemau a ariennir. Mae'r templed yma wedi'i anfon atoch yn yr e-bost gwreiddiol. Bydd angen atodi hwn i'r ffurflen gais ar ffurf dogfen Word. Dilynwch y cyfarwyddiadau ar y ffurflen gais.

Does dim terfyn i gyllid yr adran yma. Fodd bynnag, oherwydd bod y cyllid yn gyfyngedig, efallai na fydd yn bosibl cefnogi unrhyw geisiadau a dderbynnir yn llawn. Gwnewch gais am yr eitemau/costau hynny sy'n hanfodol i weithrediad parhaus y lleoliad er mwyn osgoi cau'n barhaol yn unig.

Bydd angen tystiolaeth arnon ni fod eich incwm yn llai na gwariant ar hyn o bryd. Mae templed incwm a gwariant yn eich e-bost cyflwyno a rhaid i chi ei anfon i: GrantiauGofalPlantRhCT@rhondda-cynon-taf.gov.uk

Ar y ffurflen gais fe'ch anogir i ateb 'ydw' neu 'nac ydw' os hoffech wneud cais am y grant yma. Os cliciwch chi ar 'ydw', fe'ch cyfarwyddir i gyflwyno ymatebion a thystiolaeth.

Os cliciwch chi ar 'nac ydw/nac oes' i ddweud na fyddwch chi'n darparu tystiolaeth, bydd eich cais yn cael ei wrthod ar unwaith.

Cofiwch gynnwys enw'ch lleoliad a thystiolaeth Grant i Ddarparwyr Gofal Plant yn llinell pwnc unrhyw e-byst rydych chi'n eu hanfon.

Y dyddiad cau ar gyfer ceisiadau pob adran yw **dydd Gwener 26 Chwefror 2021**. Mae'n bosibl y bydd y dyddiad cau'n gynt os byddwn ni wedi dyrannu'r holl gyllid sydd ar gael.

5. Proses Gwneud Cais ac Asesu

Gwnewch yn siŵr eich bod chi wedi cwblhau pob adran o'r ffurflen gais yn llawn. Bydd ceisiadau anghyflawn neu geisiadau sydd heb gyflwyno'r dystiolaeth ofynnol yn cael eu gwrthod a'u hanfon yn ôl atoch.

Bydd ceisiadau yn cael eu hasesu yn ôl yr wybodaeth fanwl a ddarperir.

Sicrhewch fod yr holl dystiolaeth ofynnol yn cael ei hanfon trwy e-bost i: GrantiauGofalPlantRhCT@rhondda-cynon-taf.gov.uk **Cofiwch gynnwys enw'r lleoliad a thystiolaeth Grant i Ddarparwyr Gofal Plant yn llinell pwnc yr e-bost.**

Bydd pob cais sy'n dod i law erbyn y dyddiad cau isod yn cael ei drafod, a bydd penderfyniadau i ddyfarnu cyllid yn cael eu gwneud mewn cyfarfod y Panel Grantiau pwrpasol.

Dyddiad Cau	Cyfarfod y Panel Grantiau
26 Chwefror 2021	Bydd y panel grantiau'n cyfarfod bob wythnos i drafod ceisiadau.

Bydd pob cais yn cael ei asesu yn gyson yn erbyn y meini prawf cymhwysedd sydd eisoes wedi cael eu nodi ynghyd â'r meini prawf cyllido i sicrhau bod yr arian sydd ar gael yn cael ei ddyrannu'n briodol.

Byddwn ni'n ceisio prosesu eich cais o fewn 10 diwrnod gwaith. Efallai bydd hyn yn amrywio i gyd-fynd â chyfarfodydd y panel grantiau. Efallai bydd hi'n cymryd mwy o amser i asesu'ch cais dros gyfnod y Nadolig.

Pan fo modd, byddwn ni'n anfon e-bost at ymgeiswyr i roi gwybod am ganlyniad eu cais cyn pen pythefnos ar ôl i gyfarfod y Panel Grantiau gael ei gynnal. Ar ôl derbyn e-bost yn dweud bod eich cais am grant wedi bod yn llwyddiannus, byddwch chi'n cael ffurflen 'Amodau Derbyn'. Rhaid i chi gwblhau'r ffurflen yma yn llawn, ei llofnodi a'i hanfon yn ôl i'r Garfan Gofal Plant trwy e-bostio GrantiauGofalPlantRhCT@rhondda-cynon-taf.gov.uk.

Os na fyddwch chi'n cyflwyno'r ffurflen amodau derbyn wedi'i llofnodi, fydd dim modd i ni roi'ch taliad.

6. Y Broses Dalu

Bydd y taliad yn cael ei wneud trwy drosglwyddiad BACS i'r cyfrif banc busnes sydd wedi'i nodi yn y cais. Bydd y taliad yn cael ei wneud unwaith bod y cais wedi'i asesu a'i gymeradwyo gan y panel grantiau a bod y ffurflen amodau derbyn wedi'i dychwelyd. Os na fyddwch chi'n cyflwyno'r ffurflen wedi'i chwblhau inni mewn modd amserol ac yn cadw at delerau ac amodau'r grant sy'n cael ei ddyfarnu, mae hawl gyda ni i wrthod eich cais a fyddwn ni ddim yn gwneud unrhyw daliad.

Am ragor o wybodaeth, e-bostiwch: GrantiauGofalPlantRhCT@rhondda-cynon-taf.gov.uk

Mae dolen i'r ffurflen gais isod:

Cymraeg: [Grant i Ddarparwyr Gofal Plant 2020-2021](#)

Saesneg: [Childcare Provider Grant 2020-2021](#)